

# مشروع الحكايا والتاريخ الشفوي

## ورشة المعارف

٢٠٢٠

الحكاوية: ريتا التنوري

السلسلة: التجربة المكانية

التاريخ: 28/11/2020

رقم الأرشيف: 20-TMOH-005

نوع الأرشيف: للاستخدام المحدود

|                         |  |
|-------------------------|--|
| السلسلة/الموضوع الرئيسي | التجربة المكانية   |
| رقم الأرشيف             | 20-TMOH-005  |
| نوع الأرشيف             | للاستخدام المحدود - يجب استشارة الحكواتية قبل استخدام هذه المقابلة لأي غرض ثقافي او بحث  |
| الحكواتية               | ريتا التنوري   |
| تاريخ ميلاد الحكواتية   | 1995   |
| تاريخ ومكان المقابلة    | 28/11/2020   |
| ملخص التاريخ الشفوي     | تعيش ريتا طفولة تصفها بأنها "حرة" في قرية قاع الريم، حيث تقضي وقتها بين الأصدقاء والطبيعة، لتستبدم بالأدوار الجندرية التي حدت من حريتها في سن المراهقة. تحاول ريتا خلق مجموعات مغايرة في قربتها وجامعتها، مع ناس يشبهونها. تنتقل من القرية إلى المدينة لنيل مساحة أكبر من الحرية، وتخطر بالعمل المسرحي وتعمل بالتدريس الثانوي، وتجد نفسها في تناقضات المدينة وناسها ونمط الحياة فيها. تشارك ريتا تجاربها مع ثورة 17 تشرين، وكيف أثر ذلك على شخصيتها ورؤيتها وعملها السياسي.  |
| معلومات عن الباحثة      | مع العديد من الأهواء والإهتمامات الشخصية التي تتمتع بها، حصلت يارا أيوب على شهادتي بكالوريوس، واحدة في الفلسفة والأخرى في التصميم الداخلي. منذ عام 2012، وهي ناشطة وعضوة في العديد من المبادرات والمنظمات غير الحكومية. شاركت في العديد من المنصات الوطنية والدولية وهي الآن المدير التنفيذي لمنظمة "من إلى" غير الحكومية.   |
| التفريغ                 | زينب الديراني  |
| الكلمات الدلالية        | سنة 1995، قاع الريم، بقاع، طفولة، حرية، طبيعة، بنات الضيعة، شباب الضيعة، المراهقة، الأهل، المجتمع، الأدوار الجندرية، الأصدقاء، بليار، شعر، جمعية ثقافية، الحياة الجامعية، مجتمع علماني، تعليم، نسوية، تاريخ النساء، طبيعة جردية، بيروت، إستقلالية مادية، كتب، مسرح، فنون، تمثيل، مسرح المدينة، مونولوج، الثورة، إنتفاضة 17 تشرين، ذاكرة إجتماعية، علاقة مع الجسد، محاولة إغتصاب، date-rape drug، وحدة، إنتاجية، نشاط سياسي، أزمة النفايات، إضراب، طرقات مسكرة، رياض الصلح، الشويفات، الحمرا، عام دراسي أونلاين، الشويفات، لحقي، إنفجار 4 آب، covid-19، حظر تجول، تغيير، روتين، علاقة بالمنزل، الإنتماء، عائلة، إنتحار، مجتمع أبوي، مدرسة الراهبات، تمييز طبقي، تمييز طائفي، الآداب والإنسانيات، تيرمينال، تعليم، تنمية مواهب، دولة بوليسية، حكومة دياب، يوم 8 آب، قوى معارضة، كآبة، دولة مدنية علمانية |

## Rights of Ownership for the Storytelling and Oral History Project

The Knowledge Workshop holds full or co-ownership of all items that it archives and publishes. Recordings published on the Knowledge Workshop website can be used only for cultural, educational and non-profit purposes, and never for commercial purposes.

To use the material on our website, including the oral histories and their related images, we ask that you always reference the Knowledge Workshop with: Storyteller's name, interviewed by Researcher's name, Date, The Storytelling and Oral History Project, the Knowledge Workshop, Beirut, Lebanon, page number. [Ex. Nazik Saba Yared, interviewed by Deema Kaedbey, 2017, The Storytelling and Oral History Project, the Knowledge Workshop, Beirut, Lebanon, pp 12.]

To use the limited-use items held within the Knowledge Workshop, you can visit our office in Furn El Chebbak and fill out a permission form. You can use these items inside the Knowledge Workshop space, but we request that you consult with us on which items you can use. Some of these items require permission from the storytellers before being used.

### حقوق ملكية لمشروع الحكايا والتاريخ الشفوي

لورشة المعارف ملكية تامة أو مشتركة للمواد التي تؤرشفها وتنشرها. التاريخ الشفوي المنشور على الصفحة الالكترونية لورشة المعارف يمكن استعمالها فقط لأهداف ثقافية وتثقيفية لا تبغى الربح، ولا يمكن استعمالها لأهداف تجارية تبغى الربح.

لاستعمال المواد على صفحتنا الالكترونية، من ضمنها التاريخ الشفوي والصور المرافقة نطلب منكم التنويه بورشة المعارف كمرجع باستعمال: اسم الحكواتية، قابلتها اسم الباحثة، السنة، مشروع الحكايا والتاريخ الشفوي، ورشة المعارف، بيروت، لبنان، الصفحة. [مثلاً: نازك سابا يارد، قابلتها ديمة قائدبيه، ٢٠١٧، مشروع الحكايا والتاريخ الشفوي، ورشة المعارف، بيروت، لبنان، ص. ١٢]

لاستعمال المواد المحددة الاستعمال الموجودة في ورشة المعارف (الغير متاحة على صفحتنا)، يمكنكم القدوم الى مكتبنا في فرن الشباك وتعبئة استمارة الطلب. بالإمكان استعمال هذه الموارد داخل ورشة المعارف، لكن نسألكم ان تستشيرونا عن أي مواد يمكن استعمالها. بعض هذه المواد تتطلب طلب من الحكواتيات قبل استعمالها.

يارا أيوب: نحن اليوم 28 تشرين الثاني 2020، الساعة 9 الصبح، بمقابلة تاريخ شفوي نسوي مع ريتا التنوري لصالح ورشة المعارف، ريتا منبلش تخبيرنا أسمك الكامل، تاريخ ومكان ولادتك.

ريتا تنوري: [00:00:20] مرحبا، إسمي ريتا تنوري، خلقت سنة 1995 بضبعة إسمها قاع الريم، ضبعة بقاعية إسمها قاع الريم، طفولتي بمعظمها كانت بهيدي الضبعة ونوعاً ما كانت طفولة حرة لأنو كل الناس بتعرف بعضها، في عادة بعدها لليوم موجودة بالضبعة إنو الناس ممكن تترك المفتاح بالباب من برا أو ممكن تترك [ينقطع التسجيل]، هيدا الشي يلي عزز فينا الحرية، كنا دايمنا برا البيوت، كنا دايمنا عم نلعب كلنا مع بعض، فلتنابن بالطبيعة، وما عنا وقت، ما منفر بالوقت، الوقت ما مشكل هيدي العقة بيوميانا، متأخر بالليل، منفل كثير كبير، منضل يوم كامل خارج البيت، مش مهم، لأنو بالنسبة للأهل نحن بالضبعة، وين رح نكون؟، هيدا الشي عزز الحرية يلي عندي، إنو ما بدي شي يحدني، ما بدي شي يقيدني، ما بجي حس إنو أنا طالعة أعمل شغلة حابة أعملها بس "لازم"، بس "عندي واجب"، بس "أوعي"، بس "ما بيسوا"، تعودت على إنو هودي مش موجودين، وصحيح إنو الأهل كان إلهن دور كثير كبير بهيدا المجال، بس بتضل فكرة إنو بنت بضبعة مشكلة بالمجتمع حالة خاصة، مش بس أنا كبنت، يعني البنات بشكل عام بالضبعة، وخاصة لما نصير بسن المراهقة، وقت اللي بدنا نكتشف الجنس الآخر، وقت البدنا نكتشف حياتنا الجنسية، وقت اللي بدنا نستمتع بأوقاتنا مع الباقين بس مش إنو هيدي المتعة الطفولية، لأ، عم نبلس نحس إنو نحن قادمين على شباب، قادمين على مشاعر، قادمين على علاقات، هون بتبلس المشاكل بالضبعة، ممم، وهي موجودة يعني بكثير مجتمعات ببلدنا أو بغير بلد، فكرة إنو بنت عم تضر برا البيت لوقت طويل، بغض النظر شو عم تعمل، ما بتعود مقبولة، يعني بذهن الناس طفلة عم تعمل هيدا الشي هي طفلة عم تلعب، شو حتفكر؟، مش حيعينها كثير الموضوع، أما مراهقة عم تعمل هيدا الشي فمشكلة، وبلشت المشاكل من هون، فعليا المشاكل مش مع الأهل، مع المجتمع بحد ذاته، والأهل هني جزء من هيدا المجتمع، كيف بدي أطلع ألعب عالطريق مع قرطة صبيان؟، "لا، عيب، ما بيسوي"، بلشت "العيب"، بعدين كيف بدي فوت على البليار؟ "أوعي!، بنت عم تفوت على البليار؟ مش مقبولة الفكرة"، وأنا ببالي إنو بدي أعملها، لأنو بكل طفولتنا أنا عم بعمل كل شي، ليه هلق بهيدي المرحلة ما بقدر أعملهن، وكان في، يعني، ما كان في عوامل مساعدة لأنو ما كنت لاقى هالبنت [ينقطع التسجيل]، --مجتمع، يعني بدي فوت--

ي.أ.: قَطَّشْتَ أَمْرَ جَمَلَةٍ، بَتَرْجَعِي بَتَعِيدِيهَا please؟

ر.ت.: [00:04:10] إيه أكيد، يلا، والمشكلة بوقتها إنو ما كان عندي البنت الصديقة اللي ممكن تشاركني ثورتني على المجتمع، ما عندي رقيقة يلي بدنا نتخبط هيدي القيود [ونقول] "مبلا بدي فوت على البليار"، إضطريت هون إستغل حدث معين، ومنو إستغلال سلبي، بالعكس، الرجل اللي بيملك البليار بيكتب شعر، وطبيعة الحال، معظم الشباب يلي بفوتوا على البليار مش رح يعينلهم الموضوع، لأنو مش همهن يفوتوا يسمعو شعر، وعرفت أنا هيدي الفكرة صدفة، قلت أوكيه، بستغلها، بلش الموضوع إنو أنا رحنت وتوددت لهيدا الرجال، هو رجال كبير بالعمر، يعني بوقتها، بالخمسيني-- عمره بالخمسينيات، فبالنسبة لألي كثير كبير، استغلتي هيدي الرغبة اللي عنده لكتابة الشعر، وطلع إنو هو كثير بحب يقري الناس أو يسمعون الناس أشعاره، بس ما في مين يسمع، كنت أنا الأذان الصاغية، عم بفهم ولا ما عم بفهم مش مهم، المهم إنو عم [ينقطع التسجيل] مجرد ما هيدا الزلمة تقبلني كبنت عم فوت لعنده، عم بشوفني بين صبيان عم بلعب، بس لأنني عم بصغيلة شو بيكتب، كان هو مساعد ودعم كثير كبير لألي إذا أي حدا حكى قدامه عني "إنو ياه، ريتا عم تفوت على البليار، يا عيب الشوم، أهلها ما شايفينها؟"، رغم إنو البليار عالطريق، هو كان دايمنا داعم لألي، مش لأنه مقتنع بفكرة إنو لأ حتى لو بنت فيها تفوت، لأ، لأنو في مين عم يصغيله. ممم، شكلت حالة بالضبعة وكانت مفرحة ومحنة بنفس الوقت، لأنو الأهل بشكل عام، أهل [ينقطع التسجيل] لهالسبب قطع فترة من مراهقتي ما عندي صديقات بنات، أنا بقضي وقتي بس مع شباب، ما في بنات بيومياتي، هيدا الشي ما كان مشكلة صراحة، بالعكس إكتسبت كثير خبرات ومعلومات يمكن ما كنت حاقد إكتسبها لو كنت بس مع بنات، بس كان في حلقة ناقصة، وصار عندي ببالي مثل تحدي مع نفسي إنو أنا لازم يصير عندي صديقات، ما فيني بس يكون عندي رفقة صبيان، وبلش هيدا الشي عبر نشاطات إجتماعية بالمنطقة، صرنا بمرحلة شباب وقررنا إنو لأ، نحن لازم نعمل تغيير على صعيد الضبعة، وهات لنأسس جمعية، وهيدي الجمعية تشتغل على نشاطات ثقافية وإجتماعية وتنموية وإلخ، ومن هون منقدر نتوجه لكل الفئات العمرية بالضبعة، لأي جندر موجود، لأي-- يعني لأي حدا. وشوي شوي تعززت صداقتي مع بعض البنات. قدرنا نعيش ما كأنو أنا بنت وفلان صبي، قدرنا نعيش كأنو نحن كليانا ناس مع بعض عايشين، اللي بقدر أعمله بيقدري عمله واللي بيقدري عمله بقدر أعمله إلخ، بتذكر بوقتها كان في دايمنا فكرة براسي، مش عارفة وين سمعتها أو وين قريتها أو مين خبرني ياه بس هيك دايمنا كانت ببالي إنو المرأ ما بتحس بالنشوة هي وعم تلمع أرض المطبخ. وكانت دايمنا علقانة بذهني وكنت دايمنا فكر بيني وبين حالي إنو إيه أنا في كثير إشيا أعملها بالحياة غير على إني فكر بدي يكون عندي عيلتي وبيتي فقط، مني ضد أكيد بالعكس بس مش هيدي هي الحياة فقط يلي بدي ياه لأ، بدي شي بالإضافة لألها، والفكرة كانت دايمنا عم تدور ببالي بس شو هي هالنشوة فعلا

يلي أنا بدي أوصلها؟، وصلنا لمرحلة الجامعة وشانت الظروف إنو أنا ما إقدر إختبر الحياة الجامعية بكليتها يعني، ككل، وحاولنا إنو كمان نخلق حالة بالجامعة، مش كنساء إنما كمجتمع صغير بقلب هالمجتمع الكبير يلي بدو يغير، ودائما بذهني في فكرة إنو المجتمعات يلي على حافة الموت أو على حافة الهبوط هي المجتمعات الرجولية، المبنية فقط على الأبوية والذكورية وإلخ، فكان عندي هدف إنو ليه هيدي الحركة يلي خلقناها بالجامعة، هيدي المجتمع الصغير، المجتمع العلماني، ليه ما بيقرر يضم أكبر عدد ممكن من الناس وخاصة تكون عم نشغل على الفكر النسوي بالإضافة لأي شي ثاني، بس كان الموضوع شبه مستحيل بظل مجتمع هالقد منغلقة، هالقد متعصب، هالقد مهيمنة عليه الأحزاب السياسية التقليدية، وللأسف إني فقدت الأمل من هيدي الحركة بالجامعة، لقيتها بالمدرسة يلي إشتغلت فيها بوقتها، وكنت عم درّس فئات عمرية بتسمحلي إني إفتح نقاشات معهن، نقاشات ثقافية، فنية، سياسية، إجتماعية، من جميعه. من هون بلّشت مسيرتي التعليمية وبلّش طموحي لأنني عم ساهم ببناء أجيال، ما بدي إبنني أجيال تودينا بعد للدمار يلي نحن فيه، بدنا تغيير، وبفس الوقت ساقبت بوقتها كان عندي فرصة إني أكتب مقال بجريدة، وبتحفظ عن ذكر إسم الجريدة، المقال المفروض يكون مضمونه نسوي، وكانت الإتفاقية على أساس إنو أنا بلتزم مع هيدي الجريدة إنو دايمًا كون عم بكتب مقالات نسوية -- عم تكتب مواضيع نسوية، قلت أوه، فرصة ممتازة، بدي بلش ب-- ما بدي مقالتي تكون غير مترابطة زمنيا، فبدي بلش من نقطة وإنطلق منها. لقيت فكرة ال-- نساء --حكايتهن-- وبلشت من بحث حول تاريخ النساء بالحضارات القديمة، واعتبرت هي رح تكون الإنطلاقة، هيدي البحث خلاني أتعرف أكثر على تاريخ النساء، على المجتمعات القديمة يلي كانت مبنية على الأمم، الحفاظ على الأرض، ديمومة المجتمعات، البناء وليس الحروب لأجل إلغاء الآخر، وبوقتها كانت النساء هني بمركز الألوهية، يعني كانت إلهة أنثى، هيدي الشئ جدا أثر فيني لأنو ليش كانت هي-- ليش كانت الأنثى هي الإلهة؟ لأسباب متعلقة بإنها بتمتلك سر الحياة. من هون بلشت إسترجع ذكريات ردتني شوي لطفولتي كوني كنت بضبعة فيها طبيعة، طبيعة جردية، طبيعة خصبة، كنت فعلا أنا ألمس القوة الموجودة بداخلي عبر الطبيعة، ولمستها أكثر لما تعرفت على هيدي التاريخ، بهيدي المرحلة تجدرت عندي أكثر قدرات النساء عبر التاريخ، مفهوم النسوية، شو يعني عدالة؟، قتنعت إنو أنا مني مع المساواة، للألأ، أنا ضد المساواة، أنا مع العدالة، وحملت هيدي الرسالة [00:14:10] وقلت إنو أنا بدي مارسها بحياتي اليومية لأنو النسوية منها فقط للنساء إنما هي بتسمح لكل إنسان بحياة أكمل، واعتبرت إنو المجتمع يلي أنا موجودة فيه، البقاع، مني قادرته بعد، صحيح إنو هي أرض خصبة، مجتمع خصب، بيحمل، بس إعتقدت إنو هيدي المجتمع بعد بيتخطى قدراتي، أنا بحاجة لطور حالي أكثر، بحاجة لأكتسب خبرات بالحياة أكبر، ولقيت المدينة، ليه ما بنزل عالمدينة؟، وطبعا المدينة بالنسبة لأننا هي بيروت، نقلت شغلي على بيروت، وانطلقت، وقررت إنو بدي إستقل لأنو الإستقلالية المادية بالنسبة لألي كانت هي الأساس لأنني عنجد صير حرة، حرة بكل معنى الكلمة، حرية فكرية، حرية جنسية، حرية بحياتي اليومية، إلخ، وفعلا هيك صار، إستقلت، وإنطلقت بتجربة جديدة بالمدينة. الشخص يلي فالل من ضبعة، عدد الأشخاص يلي بشوفهن محدود، المعارف يلي بيعرفها محدودة، لينزل على هالمجتمع المتنوع، على هالمجتمع يلي عنده إنفصام رهيب، بيروت عندها إنفصام، بتعاني من إنفصام، يقابل ناس، بيني علاقات غريبة عجيبة، ما في علاقة ممكن تتعمم، كل علاقة هي حالة خاصة، وهالعدد الكبير الكبير من الأفكار والضجة والهدوء والمغامرات والليالي، كلها، يعني بيروت بكل شي فيها كانت بالنسبة لألي مكسب كثير كبير، والمثير بالموضوع لاحظت إنتاجي قديه عم تزيد بالمدينة، بلّشت فكر إنو أنا ليش إنتاجي بداهة تزيد بالمدينة؟، بعز دين الضوضاء، بوقت يلي عندي هيدي الضبعة الهادية، الرابطة، الجبل، الشمس، العصافير تزرقق، ما بعرف [تضحك]، ولقيت إنو أكيد المكان إلو تأثير كبير، ولكن في أنا بهيدا المكان، لقيت حالي بالمدينة أكثر، لقيت حالي بين الناس الغرباء والوجوه يلي بشوفها لأول مرة، كيف بسجلها بذاكرتي، على أي أساس بتواصل بتعامل بعزز علاقة [أو] ما بعزز علاقة، ومنو شي سهل أبدا خاصة إني كنت بوقتها بعمر 22 سنة، بنت بعمر 22 سنة مستقلة بالنسبة لكثير ناس "لقطة، أوف، تمام، كثير مهم، بتعرف عليها، بعملها زيارة بالبيت، ما هي ساكنة وحدها، عمرها 22 سنة، كل شي بيركب". هيدي بحد ذاته كان موضوع بخليني إشمز، بخليني فكر قديش عنّا أمراض بمجتمعنا، وقديه هيدي الأمراض نحن عم تأثر علينا، حاملين كتلة مرضية بسبب كل هيدي المجتمع، بس فعليا هيدي الأحداث خلتنني إكتسب نضج باكر، بعتمد، وغامرت، الشئ الثابت بيومياتي كان عالم الكتب، وفعليا هيدي العالم كان إلو تأثير كبير بأي تحول بحياتي، بالكتب تحديدا بدأت أقرأ رويات، وشانت الصدف إني أتعرف على كتّاب وكتابات منتقذين على التقاليد والعادات المجتمعية، وفعلا إني أثر عليي هيدي الشئ رغم إني كنت عايشة بمكان وهمي بزمان وهمي مع شخصيات وهمية ولكن كان إلهن تأثير كثير كبير عليي، ودائما المدينة أو إشكالية المدينة والضيعة كانت موجودة بهالنوع من الروايات، لهالسبب كانت فعلا مكسب، [00:09:10] وعرفت كيف، يعني، شو هي أفضل طريقة إني كون مرتاحة بهيدا المجتمع، وأطلع بأقل خسارة ممكنة؟، دايمًا في خسارة بس بدي أطلع بأقل خسارة ممكنة، بوقتها كمان كان إلي فرصة بسبب وجودي بالمدينة، وللأسف هيدي الشئ مش موجود بضيعتي، عرفت بورشة عمل مسرحية، بالمسرح، بوقتها كنت أكتشفت إنو أنا عندي رغبة كثير كبيرة إني أتعرف على الفنون بكل أنواعها طبعا قدر الإمكان، بأنني غير بالمجتمع عبر الفنون، ساهم بهيدا التغيير بالمجتمع عبر الفنون، وقلت أوكيه رح سجل، مع إنو ما كان ولا مرة سابقا خاطر ببالي إنو أنا ممكن كون بمسرح، حتى لو كنت أحضر مسرحيات، نحن وصغار بالضيعة كنا كثير كمان

نعمل مسرحيات، بس ولا مرة كنت فكر إنو أنا بدي كون محل هالممثل أو هالممثلة علخشية، بس لما شفت الفرصة قلت لأ بدي جرب، تسجلت بورشة عمل مسرحية، تسجلت وتخرجت تمثيل وإخراج، والمسرح كان إلو دور كثير كثير كبير بإعادة بلورة شخصيتي، المسرح ساهم بتكسير أي حدود موجودة بداخلي، أكانت حدود فكرية، حدود بالتعامل مع الآخر، حدود بحياتي الجنسية، حدود مع صحي النفسية، يعني، المسرح مثل هيك، جردني. طلعت "رينا" من داخلي، قعدت مقابلي، نشأ حوار بيني وبينها، وتفاهمنا، بكل بساطة تصالحت مع نفسي، بكل بساطة. بعدني لحد اليوم بالمسرح وما بفكر لحد هلق إنني أبعد عن هيدا العالم لأنو بالنسبة لألي المسرح هو مساحة جنون، جنون جنون مطلق، ما في داعي فكر، اللي بحسه بدي أعمله، واللي بحسه يعمله، حتى بالمسرح كان عندي ثورتي الخاصة السنة الماضية كان في عنا عرض مسرحي على خشبة مسرح المدينة، وكان مفروض على كل ممثل أو ممثلة إنو هني يكتبوا النص يلي بدهن يادوه على المسرح، لأنو المسرحية عبارة عن مجموعة مونولوج [monologues]، وقلت هيدي فرصة لازم أستفيد منها، النص اللي كتبتة أكيد منيثق من شي بداخلي، كان عبرة عن حوار بيني وبين العضو التناسلي تبغي، لما كنت عم بكتب النص كان ببالي إنو لأ، هيدا ما رح يقطع [تضحك]، بكرأ بيوصل عالرقابة وبقولولي "حتغيري النص" أو "حنحذف كم عبارة"، وساقبت إنو هيدي التمارين كانت بعز إنتفاضة 17 تشرين، 17 تشرين يلي بالنسبة لألي ولكثير ناس غيري ما كانت تضييع وقت، ما كانت هموجة، ما كانت إحتفال، كانت إنطلاقة جديدة بدولة ساقطة على جميع الأصعدة، فأنا عندي هالكم الكبير من المحبة للثورة، للتضامن، للشوارع، للأرصفة، للناس الثائرة، للأصوات العالية، للشعارات المطليبية، كلها كلها، هو كلهن براسي، فأنا كيف ما بدي [00:24:10] كيف ما بدو يطلع معي نص مسرحي منتفض على كل شي موجود بالمجتمع؟ مش قادرة، يعني، صحيح إنو 17 تشرين كانت غير واضح سياسية كبيرة بالبلد، واللي يقول إنو ما عملنا شي، قرطه ثوار كانوا عم يطقوا حنك بالشوارع، لألا، غلط، غلط، نحن حققنا كثير إنجازات، كثير مش شوي. بيكفي الذاكرة الجماعية يلي بنيناها، نتعتبر عالصعيد السياسي والإقتصادي ما حققنا شي، رغم إنو حققنا، ب نحن بنينا ذاكرة إجتماعية بتتفوق على أي شي ثاني ممكن يكون موجود. كنت كون بالنهار بالشارع عم صرخ وعم عيط وبالليل عالمسرح عم بتمرن، هيدا المزيج مستحيل يطلع منو شي [تضحك] تقليدي عادي، وإنخلق النص المسرحي وما انرفض منو ولا أي عبارة. النص وحده بسيطة، منقراه منقوله، الأداء كمان كان بتوقع جريء، ووجود الدتني بالمسرح عم تحضر هيك شي شكلي نوع من تحدي، ما ترددت، ما ترددت أبدا، إنني أنا عالمسرح عم بنتقد تربية -تربية والدتي، والدي، الأهل بالمجتمع، والدتي بالجمهور بين الناس كان فعلا تحدي بس ما ترددت، واكتسبت قوة أكثر من وجود إمي بالمسرح وحسيت إنو أنا عم خاطبها لألها بالذات، أنا وعم بنتقدها، بس أنا عم خاطبها لألها بين كل هالناس الموجودين، وبالمشهد طول الوقت عم بحكي كيف إكتشفت هالعضو الموجود عندي، ممم، يكف تعرفت عليه، العلاقة اللي بنيتها معو، المجتمع شو بيزيد، كيف بآثر، المراحل يلي بتقطع فيها أي امرأة بالمجتمع، الدونية يلي نفسيا ربينا عليها، قلت لأ بدها تتكسر هيدي الدونية إنو أنا أدنى، لألا، أنا مش أدنى، مش أدنى، وهيدي السيكولوجية يلي "عولجنا" على أساسها، حتى هيدي السيكولوجية بدنا نعمل ثورة عليها، مش مقبول إنو سيكولوجياً نتعود على إنو الأنثى أدنى، ما مقبول هيدا الشي، وكمان كنت مفتتحة إنو ما حدا بيمنح السلطة للنساء، دايمًا بياخذوا منها السلطة، بمجتمعنا بقصد، بدهن ياخذوا، بس ما بيعطوا سلطة للنساء، قلت أوكيه، ما بيعطوا؟، نحن منعطي، وهيدا اللي صار فعليا، انتهى المشهد المسرحي، وبغض النظر إذا نجحت بالأداء ولا ما نجحت، إذا كنت على قدر توقعات فريق العمل ولا ما كنت، بس حققت إنجاز عالمسرح عالصعيد الشخصي طبعًا، إنو القدرات مش بس منحكي عنها، القدرات بتتنفذ، ما فينا نجي نقول "منقدر" "بقدر" بالحكي، لأ، بدي نفذ، وصار في سلسلة مشاريع لازم تتنفذ، لدرجة إنو بحس أوقات أوف بدي شي يربط، لأنو الراس ما بقى يساع [تضحك]، أي شي يمشي، أي شي يتيسر، أي شي تحقق بس لحتالي نفصي شوي، [00:29:10] ممم، فعندي فكرة ببالي هي مشروع تغيير بالمجتمع، ولكن تغيير عبر الفنون، قناعتني كثير كبيرة لأنو برأيي الفنون بتتخطى أي مكان وأي زمان، بتتخطى أي حدود موجود، بتعود الإنسان على الحرية، بتخلي الإنسان يتصالح مع نفسه، وهي therapy بالنهاية، إنو شخص عم يرسم، هي therapy بمارسها مع نفسه، شخص عم يرقص، واو واو. يعني، مشهد كثير بشع ممكن يتصور بلوحة فنية كثير حلوة، فالفن هو الجمال المطلق، حتى لو عم بصور مشهد بانس أو واقع مرير، وطبعًا هيدا كلو بيتطلب علاقات ومعارف وشبكة إتصالات كبيرة والموضوع متعب ومرهق، إنو شخص بيني علاقات وتكون هالعلاقات هالقد صادقة، جدا صعب الموضوع ولكن معلش، ببسताल أي نشاط، أي مشروع، ببسताल هيدا التحدي، من هون بلشت وسع شبكة معارفي، وإتعرّف على شخصيات جديدة، وcharacters جديدة، على ناس حلوين، أفكار، خيالات، بس دايمًا العلاقات بالمجتمعات كلياتها مش بس بمجتمعنا، العلاقات معقدة، معقدة جدا، ورغم إنها أساسية، ف، بهيدي العلاقات منقطع بكثير تجارب، تعرضت لمحاولة إغتصاب من مجموعة هيدي العلاقات من قبل شخص مش من زمان عرف إنو -- مش من زمان إنشرت صورته على social media إنو هو شخص محاول يتعدى على فتاة أخرى بلبنان وخارج لبنان، وإسترجعت الحادثة يلي صارت معي بوقتها، كيف إنو -- كيف نحن هيك مناخد الناس على نياتنا، من فكر إنو ممكن الناس تكون فعلا منيحة، بس برجع بوقل ما يمكن مش ذنبه هيدا الشخص، يمكن عنده عقد نفسية، بس لألا، ما لازم برر، فدايمًا في هيدا الصراع، هيدي المحاولة ما كانت عقبة صراحة، يعني بس تأنذكرها، الغريب بالموضوع إنو أنا كفيت حياتي، هي أكيد أثرت بنوع أو بأخر

ولكن كفيته حياتي تخطيتها نسيتهها، أو يمكن فكرت حالي ناسيتها، ما شاركتها مع ولا أي شخص لحد ما انتشر على صفحات facebook و twitter و instagram وغيرها، لحد ما انتشر خبر هيدا الشخص لعدت تذكرت هالحادثة وشاركتها مع كم حدا قريب، واسترجمت الأحداث وكيف أنا استدرجت لهيك محاولة، ولقيت إنو إيه أنا تعرضت لعنف لأنني ما كنت بملك القوة البدنية [00:34:10]، ما كنت بملك القوة الذهنية الكافية اللي بتسمحي إني واجه هيك حادثة، ما كنت موافقة مع إنو ننشر هيدا الخبر وكأنه "فضيحة"، بالنسبة لأني إنسان مريض، لازم يتعالج، بس هيدا الشئ ما بيعني إنو أنا ما كنت ضحية وبدي آخذ حقي، وكمان بتزني هيدي الحادثة لحادثة ثانية كمان صارت بالمدينة، ممم، منو مختلفة بالمبدأ أو بالهدف ولكن مختلفة بالآلية، بأحدى الملاهي الليلية، كنت كثير مبسوطه مع مجموعة من رفقاتي، لدرجة إني فكرت إترك الكاس اللي عم بشرب منو وقوم أرقص، وما خطر ببالي إنو ما لازم أترك كاسي هيك عالطاولة، يا بدي أحمله بأيدي، يا بدي أشربه كلو، ما فكرت، كان بعد فيو مشروب، وقمت رقصت، ورجعت شربت الكباية، شربتها قد ما كنت مبسوطه شربتها دفعة وحدة، ومن هونيك لفترة ما يعرف قديه، ما بقدر حد الفترة الزمنية، ناسية الذاكرة، ذاكرتي ما قادرة تسترجع الأحداث اللي قطعت فيها، المكان يلي أنا موجودة فيه بيبعد عن بيتي نص ساعة، وأنا مضطرة أرجع بالسيارة، وسيارتي كانت معي فالمفروض إنو أنا سوق. من لحظة اللي شربت الكاس للحظة اللي قفت ببيتي، الدم تحتي، أنا مش ذاكرة شو صاير، مش ذاكرة كيف رجعت عالبيت، رجعت أنا بالسيارة، وإذا أنا رجعت بالسيارة مش ذاكرة الطريق، حدا وصلني مش ذاكرة هالحدا، اللي صار إني قفت عم بيكي، نايمة عالارض، وفي تحتي على الأرض دم، في بقعة دم كبيرة. ما ز عجي منظر الدم تحتي وعليي قد ما انزعجت من فكرة إنو أنا ما عم بتذكر شو صاير معي مع إني ما كنت سكرانة، للألأ، ما كنت شاربة كثير، هيدا هو يعني الكاس الوحيد وكمية قليلة، ما كبيرة، أنا ما كنت سكرانة [تأخذ نفس]، وطبعا رفقاتي وأهلي والكل كان عم بدقولي وأنا أكيد ما عم رد على التيليفون، أنا مش هون، مني واعية، مش موجودة، انقلب الكل عليي، خاصة الناس اللي بيعرفوا إنو أنا ضاهرة لأسهر، فبتصير دايمًا تجي أفكار سلبية على بالنا، إنو يمكن تعرضت لحادث لخطف لضرب لشو بعرفني، أي شي، لأنو منو شي غريب يصير بمجتمعنا، ممم، بوقتها فكرت إنو بدي روح لعند طبيب شرعي لأعرف شو صار هيدا الدم. تحت، تأكدت إنو أنا ما تم إغتصابي ولكن كان في محاولة. كيف عرفنا إنو كان في محاولة؟ لأنو قدرنا نعرف شو المادة يلي دخلت على جسمي، قدرنا نتأكد إنو في حدا حط مادة معينة بالمشروب تبقي وأنا شربت هيدا المشروب، وعرفنا شو هي. عرفنا لأنو بوقتها كنت عم باخذ دواء للحساسية، وصار في تفاعلات بجسمي لأن شربت هالمشروب يلي فيو هالdrug، هيدا المخدر، صار في تفاعلات، وهيدا الشئ سببلي نزيف، تأكدنا إنو هيدا المخدر هو raping drug، يعني مخدر يوضع للإغتصاب، حدا حط هيدا المخدر بكاسي والهدف كان إستدراجي لأجل الإغتصاب، الظاهر إنو أنا من بعد ما شربت سريعًا طلعت بسيارتي وفليت، طبعا العادة ساقت فيني [تضحك]، ما بذكر الطريق، ما بذكر كيف رجعت عالبيت، يعني مش ذاكرة ولا شي، فهيدي الحادثة لفترة معينة من الزمن خلنتي أنفر من المدينة، خلنتي أنفر من الناس، وخلنتي إقعد مع نفسي رغم إني بخاف كثير من الوحدة بس كنت كثير عم بطلب الوحدة بهيدا الوقت [00:39:10]، وما كنت أبدا عم فكر إنو شو صار بجسمي، كنت عم فكر عنجد في شخص ممكن يعمل هيك شي؟، عنجد أنا عايشة بنفس المجتمع مع شخص بفكر، أو بتفكر، بهيدي الطريقة، ف، إيه، كانت فترة عايشة مع نفسي، وحدة تامة وكان صراع بشع صعب، لأنو بخاف كثير من الوحدة وبنفس الوقت أنا عم بطلب الوحدة، أنا عم بطلب الشئ يلي بخاف منو، يلي ما بدي عيشه، وكنت عم عيشه. وبعد فترة لقيت إنو لأ ما فيها حياتي تبقى هيك، إذا بدي أجي أحكي بالمحبة والسلام، حيكون شي كثير يمكن Utopia، شو بعرفني، شي جدا مثالي، مش واقعي، قلت إنو شو بدي أعمل؟، عنجد شو بدي أعمل؟، يعني أعتبرت إنو الحادثة يلي صارت معي منها حادثة فردية، أي شخص معرض يصير معو هيدا الشئ، وأنا بدي أعمل، ما بعرف، بدي الناس تعرف إنو هيك شي موجود، أكيد الناس بتعرف، بس قصدي بدي وعي على كل هيدي التحديات والمخاطر اللي نحن عم نتعرضلها بشكل يومي، وقررت إنو أنا ما رح أترك المدينة، إنتاجيتي بالمدينة ما بتسمح إني أتركها، وإنتاجيتي هو ش بيعطيني لذة بيعطيني متعة، يمكن أكثر شي بيعطيني متعة بيومياتي هي الإنتاجية، طبعا بالإضافة لكثير إشي ثانية بس هيدي من أكثر الشغلات يلي بتحسني بمتعة، و[تضحك] بوقتها هيكدار نقاش بيني وبين مجموعة من رفقاتي حول النسوية وشو فينا نعمل، وكيف نحن معرضين بكل لحظة لأي خطر، وأنا كان بذهني أنو لأ، صحيح نا كينت معرضة أكثر بس إنو الطفل معرض، والصبي معرض، والعجوز معرض، وكل الناس معرضين، [تضحك] وكنت دايمًا هيك قول، يكون جوابي، ردي، بهيدي النقاشات، ما في فكر إنثوي، الدماغ منو عضو جنسي، ما في فكر إنثوي، في ممارسة، في ممارسة. وهيدي القاعة خلنتي إرجع أطلع من بيتي، إكسر وحدتي، قابل المجتمع، حارب بالأمراض هالعقبات هالمشاكل الموجودة بالمجتمع، وكفي. ممم، هلق أخذنتي ذاكرتي لهيدا الشئ، هيدا الشئ قبل 17 تشرين، قبل المسرح، فإذا منرجع منقرب شوي، وأحكي أكثر عن إنتفاضة 17 تشرين وتأثيرها الكبير ع شخصيتي ونشاطي السياسي وغيرو، هي هيدي الإنتفاضة طبعا منطلقة من كل هالتجارب يلي مرت، ممم، قبل 17 تشرين كنت دايمًا فكر "[هل ممكن] أنتظم سياسيًا؟" أهلين، وين، بحزب تقليدي؟ كرمال شو؟ فاقدة الأمل. مع 17 تشرين، إلتقينا بكثير ناس بنتشبهنا، منشبهها، ناس حلوة، صادقة، ممم، في معاناة كبيرة بالمجتمع، في رفض، في منظومة كاملة بدها تعمل فينا أسوأ بكثير من ما نحن هلق، وهالشئ مرفوض، هالشئ كليا مرفوض [00:44:10]، ليلة 17

تشرين أنا ما كنت بالشارع، كنت ببيني، وعلى أساس إنو ثاني يوم شغل، بعدني بدرّس بالمدرسة، فثاني يوم مدرسة، كانت ليلة سبت وما قدرت إني أفتح Facebook أو أي شي ثاني لحتالي أعرف شو عم بصير. قبل ما نام قلت يلا بعمل إطلالة سريعة، فتت على facebook وشفت [تضحك] البلد ولعان!، في موجة أوف، في موجة رهيبه بالبلد، وأنا وين وهني وين، بس ببني وبين حالي إنو "شو عم بصير؟" متلي مثل الكل "شو عم بصير؟" بنزل؟ ما بنزل؟ لأ بكرأ عندي شغل، كيف بدني أنزل؟ الساعة 11 بالليل، دغري حكيت مع رفقاتي وما بدني بيّن كثير بعيدة عن الأجواء قلت لرفقاتي "بليز ما تكرهوني بس شو عم بصير؟" [تضحك]، طلعا هني عم بشاركوا بس بنفس الوقت هني مش فهمانين شو عم بصير. نمت، ما أخذت و عطيت، تذكرت وقت أزمة النفايات بالبلد، وقت نزلنا على الشارع وقاتلنا وتعرضنا كمان لقمع ولعنف ولغيره، وكيف إنو إنجاز اتنا ما كانت-- ما حققنا إنجاز فعلي لنكسب ثقة الناس ونكفي، ف خفت إنو نرجع نكون عم نعيد نفس الشئ. ثاني يوم وعيت على إنو في إضراب والبلد ولعان، وما فيني البلد ولعان وأنا بالبيت، لازم فل، الطرقات كلها مسكرة، ما بقدر أمشي بسيارتي، حاولت روح بتاكسي، كمان ما بقدر أخذ تاكسي، فقلت بسيطة، مشي، رح روح مشي، رح أنزل على رياض الصلح من منطقة الشويفات، فهي، يعني هي مسافة طويلة بالنسبة لشخص بدو يقطعها مشي، ووقتها كان عندي مشكلة بركبي، ما كنت عم بقدر كثير إتقل بسهولة، ولكن ما بعرف من وين فجأة بطل عندي مشكلة جسدية أبدا، مشيت المسافة كلها، قطعت المسافة كلها من الشويفات لرياض الصلح مشي ما حاسة، خلص، في قوة جواتي عم باخذها من الشارع من الناس من النار الولعانة وين مكان، من هيدا الجنون، فأوف، كان شي صراحة ما بيتصدق وما بينعاد، أساسا نحن ما بدنا ياه بنعاد، وإذا منجي منقول بدنا 17 تشرين 2019 تعيد، لألأ، هي مرحلة ونحن هلق بمرحلة ثانية ورح نقدم على مرحلة ثالثة ورابعة وإخ، بس فترة 17 تشرين وكل ما تلاها كانت من أجمل لحظات حياتي لحد اليوم. يعني ناس من ال8 بكير ويمكن أكثر كمان، لآخر الليل فلثانين بالشوارع ثائرين وثائرات على كل شي، بدنا كل شي [تضحك] بدنا كل شي. عم بحكي عن الموضوع بعاطفية أكثر تما فوت بالسياسة، بس بارجع بعيد أنو الذكرة الجماعية اللي بنيناها هي أجمل ما أخذناه من 17 تشرين. ممم، عدد الناس اللي التقينا فيها، إرتباطنا مع الأرض، مع المدينة، مع المناطق، انكسر هيدا ال-- كنا دائما نحكي ببيروت المركزية وبدنا نعمل كل شي بالمدينة، وبدنا نركض كلياتنا على المدينة، ويلا هات لنعمل مسرح، يلا هات لنعمل ثورة، هات لنعمل مسيرة، كلو كلو ببيروت، 17 تشرين كانت إنطلاقة إنتفاضة المناطق جميعها بلبنان، بوقتها قلت لأ، أنا بدني أرجع وثور بالمنطقة يلي لازم ثور فيها، يلي لازم بالنسبة لألي إني ثور فيها، وطبعا هيدا كان الجو العام، وما زال لحد اليوم [00:49:10] إنو المدينة بكل ما تحمله من تنوع ومزيج قصص حلوة قصص بشعة، الحمرا بالذات الروح اللي موجودة بالحمرا مش موجودة بأي مكان ثاني، حلوين، وحلو إنو كل شخص يقطع فيهن، يكونوا هيك محطة من محطات حياته ولكن رجعنا للمناطق، رجعنا لأهمية الثورة الحقيقية بالمنطقة يلي نحن موجودين فيها، أهمية العمل على إقتصاد تعاوني بديل، على حركات ثقافية بديلة، على نشاطات فنية توعوية، على مشاريع تنمية إجتماعية، وهيك صار، شانت الصدق إنو هالعام الدراسي يكون أونلاين [online] هيناني أنا حاليا موجودة بضيعتي مش موجودة ببيني بالمدينة. عبر إنتظامي السياسي مع مجموعة سياسية تقدمية جدا وما عندي مشكلة إذكرها لأنو صراحة بفخر بهلاشي، إنتسابي ل "الحقي"، هيدا المجتمع يلي بشعر إني أنا فعلا بنتميلة، المجتمع البديل اللي عم نطمح إننا نحققه، لحقي فعليا ردتني على ضيعتي، ردتني على منطقتي يلي بدني أنطلق بثورتي منها، وإذا بعدين مثلتم كلياتنا بالمدينة يكون شي كثير حلو، بس إذا منقوم بالبلد كلو، بكل منطقة فيه هو شي أحلى بكثير، فرجعت على البقاع، وهيناني بعدني عم بشتغل سياسة وإجتماع وإقتصاد بالبقاع مع مجموعة من زملائي وزميلاتي بلحقي، وكنا ماشيين وكثير تمام لحد ما صار تفجير 4 آب تفجير المرفأ ببيروت، ولقينا حالنا كلنا رجعنا نزلنا لنلتي النداء الإغاثي، لقينا حالنا كلياتنا عم نتصارح عن جديد بالمدينة. تفجير 4 آب، اعتقدت مع مجموعة كثير كبيرة اعتقدنا إنو 4 آب لازم تكون شرارة ترجع تولع البلد من جديد، للأسف كانت إحباط إضافي. قد ما اشتغلنا أول كم يوم ما كنت واعية للتفجير بحد ذاته، كنا عم نتنقل بالبيوت، عم بتقل بين أرواح، بين حياتات، ما كنت بعدني مستوعبة الحدث بحد ذاته. روح، قتلوا روح، ومسؤوليتنا نحن نرجع نحبي هيدي الروح يلي ماتت وفعلا هيك صار، بوقتها حاولنا نرجع ننتفض من جديد بالمدينة من جديد، ممم، وكانت ليلة 8 آب التي لا تنسى، إحتلال كذا وزارة [تضحك]، ويلا، وما بعرف، بدنا نطلع ببيان سياسي من شي وزارة، المجموعات السياسية التغييرية لازم تتوحد كلها مع بعضها، فكان في هيدا النشاط السياسي بالإضافة للنشاط الإغاثي التطوعي، كيف دغري بدنا نلبي، بدنا نلبي بعض، بدنا تشكل حركة تطوعية كبيرة تكون عم تشتغل وفعلا هيك صار، تشكلت حملة تطوعية جدا كبيرة كنا عم نلبي للنداءات الإغاثية من مساعدات عينية لغيرها، ودايما بذهني كان في صراع مع هالمدينة، هالمدينة يلي نحن مستعدين نعطياها كل شي [00:54:10] بس بدنا كمان نعطينا. الروح اللي كنا ناخذها من المدينة فقتناها خلال هيدي الفترة، ومع covid 19 وحظر التجول والقعدة بالبيوت شكل إحباط إضافي بين كثير ناس، هيدا الإحباط بخيلنا نتردد إنو نحن قادرين نعمل بعد شي؟، فعليا إيه، طبعا قادرين، الأمل بالناس رغم إنو الناس على مر ظروف كثيرة عم تحبطنا بس إنو طبعا الأمل بالناس، وبشوف دور جدا كبير للنساء بهيدي المرحلة لأنو أدوار الذكور والإناث مش ثابتة بيولوجيا إنما مبنية إجتماعيا، يعني نحن منتملك القدرة الكافية لحتالي نغير ويكون في عنا دور فعال بالمجتمع، على الصعيد الشخصي ثائرة طبعا ما زلت على جميع الأصعدة وعندي قناعة



بذهني أنو المرأة بتخلق السلام، ليه ما منعطي فرصة لتكون كلنا عم نتعاون مع بعض لنخلص من فكرة إنو إذا رجل أعطي رأييه هو "رجال" بس إذا مرأة عطيت رأيها فهي "عاهرة"، مرفوض كليا هيدا القول، النساء فعلا أثبتنا وجودنا بالمجتمع أكان خلال فترة 17 تشرين أو من بعد تفجير 4 آب، بينهن، قبلهن، من بعدهن رح نثبت هيدا الشئ، بس مش وحدنا، أبدا مش وحدنا، نحن، يعني، أي جندر موجود بالمجتمع، والأطفال والعجزة، كل الفئات العمرية وأي جنس أي جندر الكل الكل مع بعض منشكل فعلا حالة تغييرية بالمجتمع، بدنا نوقف نساء-- تسيطر قوة على النساء، تسيطر قمع على النساء، امرأة مقموعة بدها تقمع امرأة، ما فينا نكفي هيك، بدنا نكفي كلنا مع بعض، يعني رغم الوضع الصعب والبشع يلي نحن عم نمر فيه، الأزمة الإقتصادية وكوفيد-19، بس هيدا مش مفروض يشكل عائق، برجع بقول إنو هي مرحلة، نحن مرحلة عم نقطع فيها، حنتتهي، حننتقل لمرحلة جديدة، ممم، بعني بمنطقتي عم حاول ساهم ببناء إقتصاد بديل، مع هالمجموعة الحلوة الموجودة هون، بفكر كثير بأنشطة فنية تغييرية عأي صعيد المجتمع بالمناطق وليس بالمدينة، والمدينة هي الروح [تضحك] بحس بنزل باخذ نفس من المدينة، بشرح، بعني طاقة، وبطلع. ممم، صحيح علاقتي بالطبيعة متجزئة من الطفولي بس شخصيا بكتسب القوة من الناس، بحس الطبيعة جزء مني موجود بداخلي يعني ما في داعي روح زور الطبيعة لجدد الطاقة، لألا، هي موجودة بداخلي، فأنا بزور الطبيعة لأسرد فيها، لكون بعيدة عن تلوث [00:59:10] عن ضجة عن شغلي، ولكن بكتسب القوة من الناس، خاصة من الناس الموجودين بالشوارع، بعجقة السيارات، بصوت المعامل، بالبيوت، بالمدرسة بين التلاميذ وبالجامعات بين الطلاب، من هونيك وكثير متشوقة صراحة ليخلص حظر التجول، لحتالي أرجع أنزل عالمدينة جدد الطاقة، وأرجع أطلع لنعرف نعمل شي [تضحك]، ممم، إيه

ي.أ.: إذا منقدر نرجع شوي لورا، حكيتي إنو صار عندك بيتك الشخصي، شو بيعينك هيدا الموضوع، إنو تتركي بيت أهلك وتصيري ساكنة لحالك؟

ر.ت.: [01:00:18] لما أستقلت كانت أول مرة لألي بترك بيت أهلي إختياريا، يعني أنا قررت إنني أترك بيت أهلي وأستقل، وقبلها ما كنت أخذة فواييه، يعني ما مختبرة هيدا الشئ، يعني كانت نقلة نوعية، مش بس نقلت على بيت جديد، نقلت على منطقة كمان جديدة ما كنت بعرفها، وما كنت بعرف ولا أي حدا فيها، بيتي بتذكر أول ما رحنت عالييت كان فاضي، يعني فيو الأساسات، فاضي من أي شي، أنا وعم بفرش البيت، أنا وعم أستغل ببيتي، نشأت علاقة بيني وبين كل زاوية بالبيت، وصرت أتخايل، هون، هي زاوية القراية، المطالعة، هيدي مكتب الشغل، هيدا هون مثلا قعدة ال-- ما بعرف، مثلا قعدة الأصدقاء، هيدا هيدا، لقيت حالي عم ببني بيتي مثل ما ببني شخصيتي، ولقيت بيتي بالأخير ببشبهني، ببشبه شخصيتي، هو كان مرأة لألي، وكنت لما بدي أستضيف حدا ببيتي حس وكانو هيدا الشخص عم يدخل على حياتي، أو عم تدخل على حياتي، لأنو هالقد عنالي بيتي، بيتي هو أنا، هو أنا داخليا وخارجيا بكل ما أملك، صحيح إنو هيدا الشئ ممكن يعني تعلق بالمادة، فعليا لأ، ممم، ما كان تعلق بالمادة، إنما هو الكل، ككل، يعني البيت ككل، بكل ما فيه، يعني كل تفصيل موجود فيه بعير عن جزء من شخصيتي، بس كثير سهل إنني أستغني عن هيدي المادة وأستبدلها بمادة ثانية أو غير هيدي الزاوية أستبدلها بشئ ثاني، بقصد كثير سهل كفكرة، مش كتطبيق، ممم، بيتي هو مساحة أمان لألي بعيش أنا أنا، ببيتي تعرفت على كثير جوانب من شخصيتي ما كنت واعيتها، اكتشفت إشيا فيني ما كنت بعرفها، ما كنت بولا يوم من الأيام فكر أنو أنا معقول أرسم، بس بهاللحظات اللي قضيتها وحدي بالبيت، بصير الواحد هيك يخرطش وكذا، لقيت إنو بقدر نمي هيدا الشئ الصغور الموجود فيني، لقيت حالي اكتشفت إنني ما بحب أستغل بالأكل [تضحك] ما كنت بعرف هيدا الشئ، كنت دايمًا لما كنت بالبيت عند أهلي بدي أشترى دفتر بس لأيد عليه الطبخات لأتعلم كيف بدي أعمل طبخات ومحمسة، وأبرم بالضبعة من بيت بلبيت وأسئل هيدا الزلمة أو هيدي المرة كيف بدي أعمل هالطبخة ومدري شو، وحملت معي الدفتر، من كل عقلي أخذته عالييت، ببيتي اكتشفت إنو آه أنا ما بحب أستغل بالأكل [تضحك]، فتعرفت عحالي أكثر، أكتشفت إشيا بحبها وإشيا ما بحبها، وممم، وبيتي أكدلي إنو أنا ما بمل، ما قطع ب ولا ثانية ملل، دايمًا عندي شي أعمله، دايمًا، ولا مرة شعرت بملل، ولا مرة شعرت بوحدة، ولا مرة حسيت بعدم راحة، بالعكس، كان بيتي هو أنا، بغض النظر إذا موجود بهالمكان بالذات، لأ، ممكن ينتقل، يصير يمكن بدولة أخرى بس هو أنا، وكثير بفكر لما بدي أستقبل شخص ببيتي أدعي ناس تجي لعندي، الموضوع منو بسيط دايمًا بكون عم فكر أنو أنا عم دخل حدا على حياتي، هالقد بيعينلي صراحة، وبالأضافة للقصاص الجمالية يلي منصير تنزلك فيها، المكتبة وال cactus المتلية الدنية، و[تضحك] يعني هالك تفصيل اللذيذ والصور المعلقة بالحيطان، وغيرها، إيه.

ي.أ.: كيف بتحسي إختبارك للضيعة من بعد ما إنت نقلتي عالمدينة وسكنتي لحالك واختبرتي المدينة؟

ر.ت.: [01:05:48] أوف، إذا بدي أعطي جواب إنفعالي بقلك "ما مصدقة أرجع عالمدينة"، هيدا هيك الجواب الإنفعالي يعني، بس بس فكر بالموضوع أكثر من مرة بلاقي إنو لأ بدي قضتي وقت أكثر بالضبعة. لأنو المدينة فيها أفاق أوسع، تجارب أكبر،

معارف أشمل، ممم، ناس أجدد، فيها تنوع أكبر بكثير، هيدا التنوع هو بسلم ب-- يعني أنا من هيدا التنوع الموجود بهيدي المدينة بحس حالي دايمًا عم بتجدد، في تجدد دائم فيني، دايمًا في عندي تغرات بشخصيتي بدي أشتغل عليها، دايمًا عندي نقاط قوة بدي أرتكز ونميتها، دايمًا عندي تحدي أنو أنا عم بكتشف شي جديد، عم بتعرف على ناس جديدة، عم روح على مكان ما بعرفه، يعني المدينة عبارة عن تحدي دائم، إني أرجع على منطقتي، على المكان يلي حافظه كل شبر فيو، ومعوودة على كل وجه، الناس الموجودة هون معوودة على نمط تفكير ونمط حياة روتيني ثابت، محاولة التغيير صعبة، فجواب إنفعالي بقلك إيه أنا مش مصدقة أرجع عالمدينة بس لأ إذا بفكر بالموضوع أكثر من مرة بلاقي إنو هيدا التحدي الفعلي لألي، مش التحدي بس إنو أنا كيف بدي واجه أي جديد بالمدينة، التحدي إني أنا كيف بدي واجه النمطية الموجودة بمنطقتي، وغيرها، وغيرها لقصص ثانية، خاصة إنو بالمنطقة هون بالبِقاع الأوسط، الحركة الثقافية غايبة، الحركة الفنية ما موجودة، هي حكر إما عالحرركات الرسولية أو على الأحزاب السياسية التقليدية، فعليا مش موجودة، فبحس إنو ما في غذاء للروح، يعني عادة الإنسان لما بيتعب من أي شي بالحياة بيحتاج إنو بدو غذاء للروح، للنفس، أنا بالنسبة لألي غذائي الروحي هو الفنون، الفنون هي البتجدد الطاقة الموجودة بداخلي، بغياب حركة فنية هون، متعب متعب متعب، يحاول دايمًا لاقى أساليب ثانية لأنني أتجدد، لأنني حافظ عالأمم الموجود عندي وأنقله لغيري، صعب كثير ولكن ما استسلمت، ووجود مجموعة منسجم مع بعض فكريا وحياتيا، فعليا هيدا دعم كبير، وعلى صعيد العلاقات بحب ميز بين العلاقات الموجودة هون بالمنطقة والعلاقات الموجودة بالمدينة، وأكد ما عم عمم، وضد إني عمم، بس كثير صعب شخص يلاقي بالمنطقة، بعيدا عن المدينة، يلاقي ناس بتشبهو، بتشبهو إذا كان عندو فكر تعبير ي توري تقدمي، لأنو المناطق فيها نوع من الروتين، نمطية معينة، فلحق ولاقي هيدا الشخص مجموعة أو أشخاص متجانسة معو من هيدي الناحية، بتكون العيلة الإختيارية يلي نحن منختارها، وأنا هيدا الشي يلي معلقتي أكثر بمنطقتي، مجموعة رفقاتي يلي منقعد منفكر أنا وياهن كيف بدنا نغير وكيف بدنا نخلق مشروع إقتصادي بديل وكيف بدنا نعمل نشاط فني وكيف وكيف وكيف، بحسهن العيلة الإختيارية يلي أنا اخترتها، مش العيلة الوراثية يلي خلقت وربيت وانتميتها، انتميتها وراثيا يعني، ونادر جدا هيدا الشعور بالنسبة لألي إني أختار الأسرة أو المجتمع يلي بدي أبني معو المجتمع المنسعى أنو نبنيه على صعيد الدولة، يعني فيو شوي من العاطفية وفيو شوي من الواقعية بنفس الوقت. ما مصدقة أرجع عالمدينة بس بنفس الوقت مستمتعة كثير.

ي.أ.: شو أكثر حادثة ممكن تكون عالقة بذاكرتك إذا بتتذكرني أكثر طفولتك بالضبعة أو ببيت أهلك، وفيهن يكونوا أكثر من حادثة أو فيهن يكونوا، ممم، بمكان معين بلكي؟

ر.ت.: [01:11:07] ممم، لما بدي أتذكر طفولتي الأولى، صراحة ما بقدر أتذكر إلا معاناة لأنو كنت بعيدة عن الوالدة والوالد وأخواتي، ممم، لأن الوالد كان مريض وما لازم كون بجو مرضي، هيك أعقدوا أهلي، بعدوني، بعدوني عن البيت، بفترة معينة ربيت مع شخص من أفراد العيلة، ممم، ما كانت معاملتهن منيحة معي، كانوا عم ينتقموا من والدتي عبري، فعليا تعرضت لعنف، بعدين فليت هروبا من هيدا البيت على بيت أهلي بس كمان ما قدروا يستقبلوني بالبيت لأنو كان الوالد ما زال مريض وعلى مشارف الموت، فاضطريت هون إني ألجأ كمان لبيت آخر غير العيلة، غير العيلة الصغيرة، الأسرة، ممم، فربيت مع بيت عمي، عمي وزوجة عمي متوفيين، فأولادهن بس كنت عايشة معهن، نشأت علاقة بيني وبين ولاد عمي بوقتها، هني بيكبروني منيح بالعمر، بيكبروني يعني في 20 سنة فرق، نشأت علاقة غريبة بيني وبين ابن عمي، إنو أنا كنت طفلة بوقتها يعني بكون عم بلعب مع رفقاتي، طفلة، بنفس الوقت لما شوفه نقضي وقت مع بعض مش عأساس إني طفلة، نكتب، نحكي بمواضيع فلسفية، فهيدي الذكريات خلقتلي نوع من المشكلة مع الأمكنة إني كنت دايمًا مشتتة بين هون وهون وهون وهون بس بنفس الوقت أنا بحاجة لأستقر، بنفس الوقت خلقتلي تعدد شخصيات، ما عم بحكي بحالة مرضية، أو يمكن، ما بعرف، بس إنو أنا عم بحكي بالشي يلي أنا واعيته، كنت حس حالي متعددة الشخصيات، بس [تضحك] بلعب الدور لاصح، هي هي العبارة، كنت بكل مطرح عم بلعب الدور بالطريقة الصحيحة، ما كنت ولا مرة عايشة أنا حقيقتي، كنت دايمًا عم بلعب الدور بالشكل الصح، فالحادثة، يعني لأوصل لمحل وقول إنو --بعد فترة ابن عمي إنتحر، ابن عمي يلي جربت معو كثير إشي لأول مرة، اللي أكثر شي علقان بذهني إنو لما انتحر أنا ما زعلت، ما زعلت، أكيد بشتاق بس ما زعلت، هيدا الشي كثير بخوفني بذاتي، إنو معقول أنا ما بحس؟، معقول الموت ما بأتير فيني؟، خاصة إنو ببني مات، الشخص يلي ربيت معو لفترة وتعرضت لعنف منو كمان ماتت، بعدين ابن عمي إنتحر، يعني هودي 3 أشخاص هني مفروض مراحل مؤثرة بحياتي كان فيهن موت، ما، ما، ما، يعني هلق بس أتذكر إنتحار ابن عمي ما بيز عجني الموضوع، بشتاق للحظة-- [ينقطع التسجيل ويواصل] فهيدي الاحداث اللي قطعت بفترة عشر سنين تقريبا من حياتي خلقتني خاف، خاف من حالي، خاف اني ما اتفاعل مع الآخرين خاف اني ما اقدر انسجم بجو انفعالي معين و-- [01:06:07] وبعدين كفيت عادي كانوا مجرد احداث بتذكرهن، اما بسترجع ذكريات حلوة، [أو] ذكريات مش حلوة و بتخطاهن مش اكثر.

ي.أ: اول ما بلشتي للحديث كنتي عم تحكي عن محطة اساسية يمكن بالنسبة لك هي البليار كمكان بتقدي تخبرينا اكثر مثلاً ليه اخترتي هيدا المكان ليش عالق بذاكرتك؟

ر.ت: [01:16:58] كوني خلقت و ربيت، قضيت طفولتي بضیعة تنسنتها للولاد بالجو العام اللي المهيم عليها يعني المجتمع الابوي الذكوري-- [ينقطع التسجيل ويواصل] و بالبليار هوي مكان يعتبر بالنسبة للناس هوي مكان للذكور و هوي منفذ حرية بالنسبة لئلهن يعني بالوقت الشب بحقلو يفوت على هيدا المكان البنات ما بحقلها فالبنات وين بدها تكون، بدا تكون بالبيت يا عم تساعد والدتها بشغل البيت يا عم تساعد اخواتها الاصغر بركي بالدروس يا اي شي داخل البيت داخل هالاربع حيطان وهالشي ما كان ابدأ قانعني، ما كان ابدأ، رافضة يعني رافضة كون راضحة لهيدا التقليد، وهيدا العرف الاجتماعي الموجود، فالبليار عالقة بذهني هلقد لانو يعتبرها هي الانطلاقة الاولى فعلياً لثورتني على للمجتمع اللي انا ريبانة في هيدا المجتمع الصغير، و بنفس الوقت كان تحدي الي لان صحيح اني تخطيت حالي تخطيت التقاليد الاجتماعية بس هيدا بشكل [تضحك] بشكل انو المجتمع بالمقابل تكون ردة فعله تجاهي مش مريحة فهيدك الفترة بتذكر كثير منيح انو بالمجموعة كان في صديقات بنات اهاليهن منعوهن، منعوهن انهن يحافظوا على صداقتهم معي على اعتبار اني بنت منزوعة رح انزع بتاتن لانني بفوت على البليار و الازمة الاكبر اذا، اذا شربنا بالبليار قنينة بيرا هيدي صارت هيك درجة متقدمة اكثر بالبنات المنزوعة [تضحك] فعلقان بذهني اي لانو فعلياً هي هيك الشرارة الاولى يلي خلقتني حس بالقوة الموجودة بداخلي و باني قادرة اعمل اللي بدي ياه و دافع عن قراراتي.

ي.أ: هلقت بتربطني انت هيدا الشي بشي الوعلاقة بيمين انت او الوعلاقة بتربيك بركي بالبيت او محيطك؟

ر.ت: [01:20:07] الهن علاقة، يعني مرتبطين بكذا حدث او لا تربيتي بالبيت رغم اني ما كنت موجودة مع الاسرة الصغيرة خلال فترة طفولتي بس لما رجعت على البيت و الوالد كان متوفي بواقع وجود ثلاث شباب بالبيت ثلاثهن بيكبروني المميز انو اخواتي ما حلوا محل الوالد و ما فرضوا سلطة عليي والفضل اكيد كان للوالدة بهيدا الموضوع و كمان هيدا الشي مرتبط بالاحداث يلي الوالدة قطعت فيها للقمع اللي تعرضتلو و ما بدها اني انا تعرضتلو، الحرمان اللي هبي انحرمت منو بنفس الوقت ما بدها انا انحرمت كل طموح موجود عندها ما قدرت تحققو و كان بدها تحققو فيني، فأولا تربيتي و جو البيت اللي فرض هيدا النوع من الحرية الموجودة عندي و هي بالدرجة الاولى حرية فكرية، الطفولة اللي ربيناها بالضیعة هي الطفولة بحد ذاتها خلقت عندي هيدا الشي لان كنا دايماً حرين، حرين يعني فلتانين بهالطبيعة منركض منط ما حدا بقلنا لا، منفل من البيت مننسى الوقت و مش مشكلة كان ننسى الوقت بالطفولة فهودي كان الن تاثير طبعاً على شخصيتي بالاضافة لدور ابن عمي انو عبره انا اتعرفت على عالم الكتب بعمر صغير و كنت اقرأ الكتب اللي فيها، هي بشكل عام كانت روايات بوقتها و روايات دايماً بتحكي عن شخصيات حرّة ثورية ثارت على تقاليد ثارت على اعراف اجتماعية يعني ظهرت من هالاربع حيطان يلي قاعدة فيهن كرمال هيك.هاو كان الن التأثير الاكبر على شخصيتي.

ي.أ: رجعتي حكيتي بعدين انو انت صريتي معلمة بتدرسي بمدرسة و ما ذكرتي شي ابدأ عن طفولتك انت بالمدرسة كتلميذة. في شي معين تتذكرني بتحبي او بتكرهي، و كيف ممكن تقارني هيدا الشي كتلميذة و ترجعي انت كمعلمة؟

ر.ت: [01:23:10] المدرسة بالنسبة لألي بتشكل ذاكرة مش حلوة، الجو العام بالمدرسة و انا كنت بنفس المدرسة من الصف الاول لحد الترمينال، الجو العام اللي كان موجود بالمدرسة كان فيه تمييز طبقي كان فيه تمييز طائفي كنت بمدرسة راهبات بطبيعة الحال مدرسة مسيحية كنا ما نلحق نكون صداقة مع اصداقنا اذا صادف انهن من طائفة مسلمة، نخسرهن بعد فترة الا اذا كانوا من طبقة اجتماعية غنية او ما فوق المتوسطة إدارة المدرسة كانت ما تطلب من يتركوا المدرسة صحيح انو قطع كثير مدرسين، مدرسات صحيح اوو كان في صداقات جميلة و البعض منها ما زلت محافظة عليها لليوم بس المدرسة بذهني هي ذاكرة مش حلوة بسبب هيدا الجو اللي كان سائد بالإضافة لانو على صعيد النشاطات ما في نشاطات تذكر ما في يعني ما كان في هيك نشاطات نحس حالنا عم نعبر-- عم نعزز موهبة موجودة عنا عم نعبر عن انفعالات موجودة في داخلنا عم نعمل نوع من therapy هيدا الشي كان غايب بالرغم من انو المدرسة كانوا يعتبروها و ما زالوا انو تنصدر اللائحة الاولى، مم، السنة الاخيرة بالمدرسة فقط كان الها تاثير اكبر لانني تخصصت بمجال الاداب و الانسانيات بالترمينال و كانت بالنسبة الي متعة، المواد اللي عم باخذن هني متعة من ادب لفلسفة لاجتماعيات حتى المواد العلمية اذا بتذكر الرياضيات كانت، كنا نشغل على المنطق فيها، هيدا اللي بتذكرو من المدرسة يعني مش اكثر.

ي.أ: هل هيدا الشي اثر بكيف بتتعاملني مع تلاميذك اليوم كمعلمة؟

ر.ت: [01:25:43] الو تأثير كبير طبعاً على سلوكي على طريقة تعاملتي مع تلاميذي لان ما علق بذهني ولا اي مدرس او ولا اي مدرسة بمدرستي كان الـ هيدا التأثير القوي على شخصيتي او على أفكاري او على سلوكي بالمدرسة، برفض اني كون اطعت مرور الكرام على طلابي اليوم برفض اني يقطع العالم الدراسي و الطلاب ما يتذكروا انو هالمعلمة بالذات اثرت هون او فتحتنا افاق هون او نمت عنا هيدي الشغلة هون خاصة اني بدرس ثانوي هيدا الشئ يساعدني اكثر للتفاعل اكثر مع طلابي ان كان بفتح نقاشات ان كان بانو نحكي عن المشاكل يلي بتواجهن يومياً وشو الحلول الأفضل ان كان اني شجعن على انن يطوروا مواهب موجودة عندهن، مواهب فنية مواهب رياضية، حتى المواهب التعليمية ليش لا، يعزوها و يطوروها و بكل بساطة انو حتى اذا ما اثرت بس اذا بدن يتذكروا بيومياتن بالمدرسة تكون هيدي المعلمة ذكرى حلوة، و المدرسة بتلعب دورها كمان من حيث قدرتي على اني اتفاعل مع تلاميذي او لا، انا بدأت درس بمدرسة بمنطقة حدث بعلبك بالبقيع بالبداية درست سنتين فوق بالنسبة الي كانوا أجمل سنتين بسنوات تدريسي لحد هلق لان كان الطلاب الي عم يشتغل معن هني مادة خام حس انو مثل السفنجة قادرين بمتصوا اي شي فشتغل معن بكل شغف و بكل طموح بكل محبة بفتح نقاشات سياسية بفتح نقاشات اجتماعية نحكي بمشاكل تعتبر taboo بالمجتمع و ما تفرق معي، المدرسة الي هلق بدرس فيا الموضوع مختلف شوي بسبب curriculum تبع المدرسة يلي نحنا منتبعا ما بيسمح كثير لهلق تفاعل مع الطلاب و لكن برفض اني كون فقط عم يعطي المادة و خاصة اني بدرس ادب عربي و الادب العربي بعصرنا اليوم تحدي كثير كبير فاولاً بالشكل منيش ممارسة اللغة العربية التقليدية و بالمضمون كمان برفض هيدا الشئ و هيدي السنة بالذات و جزء كبير من العام الماضي العام الدراسي الماضي بما انو عم ندرس اونلاين هيدي كمان بحد ذاتها عقبة بالنسبة لانا بلبنان لانو نحنا ما مجهزين لانو نكون عم ندرس بهيك أساليب مسابقة انو نحنا مدرستنا تخطت هيدي المصاعب و التحديات و كثير ماشي حالنا و حتى لو اونلاين ما زلت محافظة على سلوكي و على نفس طريقة تعاملتي مع طلابي ما بكتفي اني اعطي المادة فقط من المادة بستوحي مواضيع اجتماعية ثقافية ممكن تعني و تاثر بالطلاب و هي اساساً مهنة التعليم انا بشوفها رسالة منها مجرد مهنة و اذا شخص ما حبها ما لح يقدر ابدأ يفعل تغيير فعلي تغيير جذري فيها، و قطاع هوي القطاع التربوي بحد ذاتو مؤثر بالمجتمع يعني الانتصارات الطلابية اللي عم بحققها طلاب الجامعات اليوم بالانتخابات اللوائح المستقلة يلي عم تروح على لوائح الاحزاب التقليدية انتصار كثير كبير و أمل كثير كبير لانا و ما يبدأ من الجامعة هيدا بدا تحطو القواعد الركائز الأساسية من المدرسة الطقم التربوي هوي يلي بدو يلعب دور على هيدي التوعية على الطلاب لحد ما يوصلوا للجامعة و يكون هلق عندهن حرية فكرية مطلقة لانن فعلاً يكونوا عم يغيروا بالمجتمع.

ي.أ: بمرحلة معينة انت ذكرتي كمان انو ما لقيتني الحياة الجامعية اللي كنتي متوقعيتها بتقدرني تحكيلنا اكثر عن هيدي النقطة و هل هيدا الشئ كان الو علاقة بتوقعات او بامكان بظروف حياة؟

ر.ت: [01:31:19] بفترة المدرسة و بفترة الجامعة سنة اولي بالجامعة كان كثير صعب اني لاقى المحيط الاجتماعي يلي ينسجم معو لانو طبيعة الحياة بالبقيع او بالضبعة يلي بقاع الريم الضبعة اللي كنت عايشة فيها حياة نمطية روتينية اساساً اذا حدا بدو يفكر بشئ غير مش موجودة المساحة ليعبر عن هيدا الغير عن هيدا الشئ المختلف بفترة معينة قلنا ok و اسسنا جمعية بالضبعة، جمعية "كوادر" جمعية ثقافية اجتماعية ولكن ما قدرنا نكفي لانو ما كان في فريق العمل المتين يلي قدر كفا صفينا بالاخيرانا و شخص بركي و ما قدرنا وحدنا نقوم بهيدي الجمعية بمرحلة لاحقة بمرحلة الجامعة شكلنا الحركة العلمانية بالجامعة و لكن للاسف كمان ما كان في هيدي المجموعة الصلبة يلي قدرت تكفي سوا و ما قدرنا كفيماً بالحركة العلمانية من بعدها عبر صداقات معينة بالمنطقة معنمل نشاطات معنمل سهرات معنمل مشاريع يعني حتى لجانا للترفيه لانو نخلق تغيير معين نجح ولكن كان ترفيهه لأجل الترفيهه و ليس اكثر. ابمتي لقيت المجموعة اللي حسيت اني ينتميلها؟ من بعد 17 تشرين، 17 تشرين كانت الفرصة يلي خلنتي النقي بناس منلنتي انا وياها فكرياً بمنسجم بالرؤية الروية السياسية و الاجتماعية و الاقتصادية و الثقافية و غيرها و غيرها و هيدي المجموعة لا زلنا محافظين على بعض لحد اليوم و فعلياً هيدي المجموعة يلي مناسب سوا مشاريع او ومنبني سوا رؤية مستقبلية على الصعيد السياسي الاقتصادي، التأثير هو النمطية اللي عايشينها لانو ما في-- ما في حركة ثقافية بالبقيع، ما في وكنت ذكرت انو هي حكر على الحركات الرسولية او الاحزاب السياسية، فأهلين يعني، يعني حزب سياسي بدو يعمل حفلة موسيقية شو حتكون الحفلة؟ حيكون طابعة طابع حزبي، حزبي متخلف طبعاً، او اذا حركة رسولية بدا تعمل نشاط فني، هيدا بالنسبة لألي موضوع شخصي، موضوع شخصي لا يعمم على المجتمع، الدين و معتقداتنا الدينية هو موضوع شخصي، ما منتشر كوكو' ما في حركة ثقافية فنية بالمنطقة هون للشخص يعبر عن نفسه عن حريته، و كوني انا بشخصيتي ميالي لهيدا المنحة، المنحة الفني ما كنت لاقى حالي، هلق ب- من بعد ما اكتسبت خبرة، اكتسبت معارف، بنيت شبكة تواصلات، بفكر انو هيت لأنا اخلق هيدي المساحة، هي مش موجودة ما بدي انطرة تتوجد، بدي انا اخلقها، طبعاً مش

وحدتي، انا و مجموعة، بس الفكرة انو هيت لنحن نخلق المساحة و هيت لنحن نكون عم نفتح افاق للاجيال الموجودة بالمنطقة او الاجيل القادمة

ي.أ.: بتقدري تربطي هيدي التجربة ب-- بعقابات معينة خصها بالمكان يمكن اكثر او لا بس خصها بالافراد؟

ر.ت.: [01:35:45] التنين! خصها بالمكان و خصها بالافراد بنفس الوقت، المكان مم او ك رح كون هيك رديكالية اكثر بالمكان، و رح ارجع اكثر لمحيط الضيعة، الضيعة عنا مميزة عن غير ضيع و قرى بالبلد لأنو القطاعات كلن متوفرين فيها، القطاع الزراعي، القطاع الصناعي، القطاع السكني و القطاع السياحي. الزراعة و الصناعة هني المهيمنين، اكبر طموح لأي شخص موجود بالضيعة كان انو يا بدي املك شققة ارض، ازرعها و اهتم فيها، يا بدي-- يا اذا شققة الارض موجودة بدي شوف كيف بدي وظيفها بالصناعة، يا المعامل الصناعية الموجودة آخرتي حاشتغل فيهن، يعني فعلياً حاطين نحن فرضية مسبقة لكيف رح يكون مستقبلنا، و مقتنعين و راضيين، و ما بدنا اكثر، هيك كان الجو العام و هيك ما زال يعني، قلي قليلة جداً من الناس لي ما بتفكر بالطريقة بس منيح، منيح انو بلشت تنشأ اجيال ما بتفكر فقط هيك، مهمة الارض طبعاً، مهم نحافظ على الارض، نزرع نحصد ننتج، كثير مهم الانتاج المحاي اكيد، و لكن هيدي المحدودية ب--، بالطموحات و هيدي ال- و هيدا الرضوخ، الرضوخ للواقع لي عايشين في، كان الـ التأثير الاكبر، و فينا اكيد نطبق هيدا الشئ على صعيد منطقة لبقاع كلل، لآ، و منطقة البقاع هي منطقة زراعية، الناس بطبيعتن متعلقين جداً بالارض و تعلقن بالارض مخلين ناس عاطفين، و الشعب العاطفي هو شعب كثير صعب عليه يتقبل التغيير، لأنو كثير سهل بالنسبة لآلو يحافظ على الموجود، لأنو متعلق بالموجود، علاقة عاطفية، كثير صعب يتخلي عن هيدي العلاقة و يطلع منا لشي غير، فرغم اهمية الارض، و رغم اهمية الزراعة و رغم اهمية الانتاج المحلي خاصتن بالازمة الاقتصادية الحالية بالبلد و لكن كمان الا تأثير سلبى على الافراد، نحن بدنا نحاول كيف نحافظ على الارض و على انتاجنا المحلي و لكن بنفس الوقت العلاقة لي بتربطنا بالارض ما تكون علاقة عاطفية تأثر على تفكيرنا و على نمط حياتنا

ي.أ.: مم، تذكرتي انو بطفولة الضيعة كانت، مكان حر- فيو حرية، ليه بمراحل معينة لجأتى للمدينة، و هل المدينة كمان فيها حرية او بتشوفها بمنظور تاني؟

ر.ت.: [01:39:04] ممم، بالضبيعة كان في حرية صح، بس الحرية مم حرية محدودة فينا نقول، منضل ضمن-- ضمن هيمنة العيلة، حتى لو شخص استقل مادياً و هي المرحلة الاساسية ليكون الشخص مستقل بالمطلق و لكن غريبة فكرة اني انا استقل مادياً و استقل بحياتي الكلية و انا ما زلت ببعده عن اهلي 20 دقيقة، يعني فكرة اني انا انقل على بيت و كون عم اسس حياتي الخاصة، و لكن حياتي هلقد قريبة من اهلي و مني متزوجة، غريبة! غريبة بالمجتمع هون، هيدا سبب. السبب الثاني انو تجارب، و بدي اختبر شي جديد، هلق صحيح انو لما نقلت على بيروت كان-كان في سبب، سبب اساسي خلاني اقدم على هيدي الخطوة و لكن حتى لو هالسبب ما كان موجود كنت رح اعملا يوماً ما، السبب اني لما قررت تابع دراستي لمرحلة الماجستير، ما كان موجود، اني انقل على بيروت، لأنو لازم كفي بمرکز العمادي، و هيدا خلاني حتى اني فتنش على فرصة عمل جديدة ببيروت، فعلياً انا نقلت وظيفتي، نقلت سكني، نقلت، كان في ببالي انو، ما بدي انزل على بيروت و نفس الاشخاص و الصداقات يلي كانت موجودة معي بالبقاع، بالضبيعة، يعني الاشخاص يلي كانوا رفقاتي بالبقاع و بالضبيعة و نقلو على بيروت كمان لأسباب تعليمية او لأسباب العمل، ما بدي انزل على بيروت و يضلو نفس الاشخاص رفقاتي، لا هودي رفقاتي هون، ببيروت بدي اختبر شي جديد. بدي انفتح على ناس جديدة، مم هلق اكيد قبل ما انقل كنت بالنسبة لآلي بيروت هي مم هي هالحرية المطلقة، و انو انا نازلة حقق احلامي، ممم و طبعاً لما نزلت لقيت انو مش كثير مختلف يعني المجتمع تحت، الفرق انو التنوع الموجود بالمدينة بخلي الناس ما تحذر من بعضا من حيث الاحكام المسبقة، صحيح بخلي الناس تحذر من بعضها لأنو الشخص دايماً بيكون عم بيشوف وجوه جديدة، و نحن ما في عنا، و خاصة كينت، اني مجرد ان امشي بالشارع مجرد مسافة 20 متر، يعني اذا عنجد بدو يتأثر فيني كل شي بقطع في خلال هودي ال 20 متر، ايه بالآخر كلنا بصير معنا اعصاب، اللطيش لي متعرضلو، ومحاولات التحرش لي نتعرضلا و غيرا و غيرا، بيكفي النظراي يلي بتكون عم نتوجهلنا، هيدا الشئ بيكون موجود بالمدينة اكثر لأنو الناس ما بتعرف بعضا بالمدينة، فما في احكام مسبقة، ما في حدا رح يحكي عليي، ما في سيطر، الناس فعلياً بتكون هيك متوحشة، بس بنفس الوقت المدينة بتحمل هيدا الانقسام، في عدوانية كبيرة ببعض السلوكيات بالمدينة، بس بنفس الوقت، مم في كمان في ناس متنوعة، في ناس حلوة، في مساحة. و الحمرا بالذات، لي بيميز الحمرا عن غيرا، فيها روح. الحمرا فيها روح، عن غيرا بلبنان او بدولة تانية، في كثير دول منروح عليهم بضل معلق فينا هيدا الحنين لي موجود من بيروت لأنو المدينة فيها روح، و الحمرا بالذات يعني الها تأثير كثير كبير على شخصيتي على سلوكي على نمط حياتي و على افاعي بنفس الوقت، ممم بالحمرا كان في مساحة اكثر لأنو مارس الاشيا لي بحبا، مني بس

نازلة مني نازلة انتقل من مقهى لمقهى، من ملهى لمهى، في مسارح! دائماً في عروض مسرحية، [01:44:04] مكتبات منتشرة وبين ما كان يقدر اي حدا يفوت بأي وقت على المكتبة، دور نشر، حتى الملاهي الليلية بتحمل طابع مميز [تضحك] الحفلات الفنية، الموسيقية-الفنية الموجودة هيدي كلها بالنسبة لألي هي غداء، غداء كبير لي ما بلقي بمنطقة البقاع و يعتقد مش موجود بأي منطقة ثانية، يعني هو حكر على بيروت و عنا أمل أنو ننقل هيذا الجو على المناطق كمان

ي.أ.: هلق بيروت بأخر فترة مرقت بأحداث أساسية منا 17 تشرين و منا يمكن بعدا الازمة الاقتصادية، وإنفجار 4 آب، المدينة كتير عالم بقولو انو تغير فيها كتير قصص، هل انتي بالنسبة لألك تغيرت صورة المدينة او بيروت، او في شي تغير بتفاعلك مع هالمدينة؟

ر.ت.: [01:45:24] هلق فعلياً التبلورات السياسية، السياسية الاقتصادية مرقت من قبل، هي-- هي مبلشة من كتير سنوات بس انو انا اكثر شي هيك مأثرة فيني و بقدر قول اني و اعيتلها و عي تام، 17 تشرين، طبعاً قبلها كان في يوم الحرايق 15 تشرين الاول بالجبل، 2019 وقتها وقتها اكتشفنا او بالاحرى مش نحن اكتشفنا وقتها ظهرت اكثر قذارت صراعات اهل الحكمو بلش رمي المسؤوليات لحد ما وصلنا لل-لألا عيب شبكات المصالح السياسية المالية، بعدين لقينا حالنا بدولة بولييسية، بتسدي العدد الكبير من الناشطين و الناشطات بس لأنن انتقدو، او لأنن نشرو تعليق معين على صفحات التواصل الاجتماعي، بالوقت يلي القضاء--القضاء غايب عن الجرائم الحقيقية يلي عم تصير، مم و ما منسمع لإ بقرارات مجلس الوزراء بزيادة رسوم يعني صارت كل هيدي الاحداث، تبلورت وصلنا ل 17 تشرين، و بعدا عم بتكر المسبحة، الحريري، و استقالت حكومة دياب، و الاحداث بالبلد مش عم نلحق، مش عم نلحق، يعني حدث ورا حدث ورا حدث، ف--و بعد اقل من سنة بيجي التفجير، المجزرة يلي صارت ببيروت، ممم، خلطنا نشناق للحياة ببيروت بس بنفس الوقت خلطنا نتعلق اكثر ببيروت و يكون في عنا أمل اكبر انو نطلع من هيدي النكسة بتغيير جذري اكثر، بوعي سياسي، بأمل تغيير اوسع، لأن التفجير يلي صار خلانا نتأكد بعدم أهلية ال--ملفات أمنية و أستهترات، عم بتحط-- عم بتشكّل خطر على حياة الناس، و خطر مستمر، هيذا الشي بزيدالوضع سوفاً دائماً و ما في استجابة لل-- ما في استجابة سريعة للكوارث يلي عم بتصير، هيذا الشي بأدي لأزدياد تداعيات الكارثة، و لكن لحظة 17 تشرين انهدت الصلاحية المعطاة للمنظومة الحاكمة بأنتخابات ال 2018، ممم، 17 تشرين كانت الإنطلاقة-- و تفجير 4 آب، و غضب يوم 8 آب كلن اسقطو شرعية المنظومة بالكامل و خلّت أصوات المطالبة تعلا اكثر، و المطالب صار في الها ثقف سياسي فالتحديات، التحديات الداخلية الكبيرة يلي نحن عم نواجهه بشكل يومي، كقوى معارضة كتوار كثارا، طبعاً بفسر هيذا الخمول يلي نحن فيو اليوم، بفسر الكناية الموجودة عند بعض الاشخاص، و لكن لا بد من انو ترتكز جهودنا على مجموعات خطوات بتسمح لأنو نوصل لتغيير فعلي، ممم، بالنسبة لألي و بالنسبة لشريحة كتير كبيرة، هيدي الاحداث كلها خلطنا نوعي لأهمية الانتظام السياسي، لأهمية التضامن، أهمية لرسم أهداف من خلال تحقيقها، هدف ورا هدف، لبالأخير نوصل لدولة مدنية علمانية، قادرة انه تحافظ على مصالح الناس، قادرة انه تفرض سيادتنا بشكل عادل و هيذا كلو بيتطلب تعاون، بيتطلب انتظام قوى و مجموعات تغييرية، تقديمي طبعاً فصحيح تفجير 4 آب بالأخير كان-- كان نكسة، نكسة مش بس لبيروت، للبنان كلو، بس انا بشوفو هيك الانطلاقة الجديدة، المرحلة الثانية ل 17 تشرين، ممم، يلي كلنا هلق عم نفكر انو بدنا نعمل صياغات عقد اجتماعي تضامني يأسس لدولة ديمقراطية لدولة لا طائفية، لا مركزية، منحاذاة لمصالح و حاجات بالسياسة و القوانين و الاقتصاد و غيره و غيره و غيره، هودي كلن ما كانوا موجودين لو ما صارت 17 تشرين و لو ما وصلنا لتفجير 4 آب طبعاً ما عم قول انو لو ما 4 آب ما كنا وصلنا لهون، 4 آب جذر هيدي الاشيا اكثر فينا

ي.أ.: ممم في شي حدث ممكن بتحبي بعد تحكي عنو على الصعيد الشخصي اكثر بفترات حياتك لي حكينا عنا كلها؟

ر.ت.: [01:51:39] ممم حدث ممم، من طفولة و لا من حياتي اليومية، و لا--

ي.أ.: \_\_\_\_\_ شي بت--يمكن بتحسي انو بعد ممكن تحكي عنو ب--  
بهيدي المساحة هلق، ما ضريعني ما ضروري فترة محددة؟

ر.ت.: [01:52:02] ممم، قطعت على كل شي [تضحك] و اذا بدني استرجع على شو قطعت حتى في كتير اشيا هيك طلعت انفعاليماً ما بقدر استرجعا، ممم، ما-- ما عم بيخطر بعد شي على بالي

ي.أ.: طيب، شكراً كتير ريتا ممم كانت يعني، كان حديث ممنوع جداً و بتشكرك مرة ثانية و thank you

رت.: [01:52:48] شكراً لألك يارا، شكراً لفريق العمل و هالمشروع الحلو، بالتوفيق

ي.أ.: شكراً!

[نهاية المقابلة]